



## bitteri biudergschicht

**Text: Hans Jürg Zingg**

**Melodie: Hans Jürg Zingg**

**Begleitimprovisation: Edwin Peter**

im meer vo dr tümme  
zmitts i dr unändleche wyti vo dr angscht  
zwüsche de kantige klippe vo eländ u not  
umpfiffe vo hass  
verhaglet vo brutalität  
beschune vo re schtumpfe glychgütige vrnumft  
haub erschickt i de sümpf vo dr trägheit  
überwuecheret vo egoismus u säubschtmitleid  
uströchnet dür tuusigfachi fruschtration

es chlyses inseli biudigsfähigkeit

entdeckt mit em fernrohr vo dr fantasie  
erreicht mit em schiffli vom gloube  
grodet mit em bieli vo dr geduud  
beacheret mit em pflueg vo dr hoffnig  
agsäät mit em saame vo dr liebi  
ddünget mit em mischt vo dr wysheit  
begosse mit em räge vom vrtroue  
für dass da errünni u wachsi di pflanze  
wo dr eifach name treit: glück

undergange i dr springfluet vo de sachzwäng

(1978)